

# याकोब

## याकोब लिहि कीता चिटि

### इद चिटितुन बारेता गोस्टि

**लिहि कीतोना पोरोल:** याकोब

**लिहि कीता साल:** किरिस्तु सकम लग-बग चालिस सियुनल्ते पनस (45–50) सालकुन नडुम लिहि किय्वल जर्ता.

**मुके गोस्टि:** अद गट्कते याकोब इंवल पोरोल वेलेटिरकुन मत्ता. वीर्गटल वेर याकोब येसुनोर तमुर आंदुर. येसु पिसि मनेके, वेर याकोब वोन्गा बरोसा इर्मकि बति, सासि-नेंड्ता पेजे, वोर येसु करलेन बगवंतनोर मरि आंदुर इन्जेर सूड्सि, करि कीसि बरोसा इर्तोर.

मरट तक्लिब्बनड़ परिक्सन वोर्चि मुने ताक्केके, बगवंतन पोरो करल बरोसा मंता इंवल दुसुरकुन करे मांता. चर्चितुर सडा अनि बहिडुर लोकुर सडा मंवल तरिका सूड्सि, करल बरोसतुन बारेते करि किया वचो. किय्वलिक काम्क अनि वड्क्वलिक गोस्टिन हिंदल, करल बरोसा मंता कि सेले इन्जेर माकुन करे मांता. करल बरोसतुन बहन करि कियना इंवडुन बारेते इद चिटितगा मंता.

#### बगा बतल मंता

बरोसा अनि बुदि-गियन 1:2-8

गरिब अनि दनेवंतल 1:9-11

करब गुन्क बगवंतनल वायोड 1:12-18

सते गोस्टितुन केन्चि अद गोस्टि तीर काम किय्वल 1:19-27

चुडुर-पांदे सूड्वा 2:1-13

बरोसा अनि काम कीसि तोह्वल 2:14-26

मीवा जरब्बे मनल वेन्जेडुन करुसट 3:1-12

बुदि-गियन वालिर 3:13-18

बगवंतन करुम वरट 4:1-12

डगुक डगुक गोस्टिड पोडि कीसि वेह्मट 4:13-17

दनेवंतलिरकुन दाक सिय्वल 5:1-6

सम्दोतुन वोर्चि मुने दायना 5:7-20

**1** बगवंतल अनि येसु किरिस्तु पर्बुनोर सेव्कल याकोब्ना आंदुन. दुनिया पूरो पग्रे मासि मंवलिर बगवंतनुर बक्तलिर्कुन\* दंडोस दोसि, इद चिटि लिहि कीसेर मंतोन.

#### बरोसा अनि बुदि-गियन

2-3 नावुर दादलिर-बायिक्निट! मीकुन तक्लिब्बक अनि दुक्सड वातेके गिर मिरट वेले आनंद्ने मंट. बरोसते अब तक्लिब्बक अनि दुक्सन मेय्सि मुने सोतेके, मीकुन उंडे इचुर

वोर्च्वल गुन अब्बंता इन्जेर मीकुन टावये. <sup>4</sup>मिरट वोर्च्वल गुंतगा बडे मासि गट आतेकेन, चोकोटे बरोसतगा गट आसेर बे-कसुर वालिर आया परंतिट.

<sup>5</sup>मिट्टगटल बोने बुदि-गियन सेल्वेके वोर बगवंतन कोरना. अहन कोर्तोर वोन, राडि सिय्वक्ने कोर्ततुन तेर अदिक सिय्वल बगवंतल आंदुर. <sup>6</sup>बति बगवंतन कोर्नेके, सीतोरो सियोरो इन्जेर अनुमानम्ना बरोसते तल्कमट. अनुमानम्ने तल्कवल सम्दुर्तड हेल्वड बहन वडिदे तेदंतडो अहन मंदंतोर.

\* 1:1 बगवंतनुर बक्तलिरकुन इतेके, बारा कांदनुर यूदुल्कना जातितुर लोकुर ग्रीकु बासते मंता.

७-८ आतोर रंड तीकर्ने सोन्च किय्वल मायनल तंवा सर्दगा बस्केन बरोबर ताका परोर. अदेन साटि पर्बुनगटल तनकुन उंडे बतय पुट्मड मंदर इन्जेर आतोर आसा किय्वा.

### गरिब अनि दनेवंतल

९ गरिब बक्तलिर तमकुन बगवंतल सीता डगुर-पांदुन पिय्सि, आनंदने मंदा लागर. १० बति दनेवंतलिर बक्तलिर तमकुन बगवंतल सीता चुडुर-पांदुन पिय्सि, आनंदने मंदा लागर. बारितेके वूर गिर जाडिता पुडुन दात साया लागर. ११ पोड्द ऐसियंता, अद येदिते जाडि वतंता इंवल माकुन टावये. जाडि पुडडा सोबता रूप करब आंता. अहने दनेवंतलिर बक्तलिर गिर तम्वड काम्क कीसेर, मनेकेन नासेडम आंतेर.

### करब गुन्क बगवंतनल वायोड

१२ दुक्सड वानेके अवेन वोर्चि मेय्सि, मुने सोंवलिर बक्तलिर आसिर्वाद येतंतेर. तनकुन पेर्मा किय्वलिरकुन बगवंतल वाग्दन सीतोर अद जीवता किरिट\* दुक्सड वानेके, बरोसतगा गट निल्तुरकुन पुटंता. १३ बोनय आयि कसुर कियन साटि मन वित्तेके, बगवंतले नावा मंदुन वितुसेर मंतोर इन्जेर इंवा. बारितेके बगवंतल तंवा मंदुन कसुर कियन साटि वितुसोर अनि मीवा मंदुन आतल बुदि पुटुसोर. १४ बति हर मायनल तंवा कसुर कियना इंवल बुदिते, नियतुन बहके मासि करब्ना आसतगा कोंडे मांतोर. १५ आतल करब्ना आसा पिडमुन दात बडे मासि, पाप इंवडुन जल्मा सींता. अद पाप बेर्सनचोर बेर्सि, आत्मता सावदुन जल्मा सींता.

१६ नावुर लाङ्नुर दादलिर-बायिक्निट! मिरट पसे मायमट. १७ हर उंदि चोकोट्ना अनि पूरो बर्पुर वाले वस्तु, स्वर्गनगा मंवल बगवंतनल वासेर मंता. वोरे बाबो हाबडगा वेड्चि सिय्वलिकुन निव्हिडि कीतोर. अव वस्तुना वेड्चिते दड्मि मारियंता, बति बगवंतल बस्केट्के मारियोर. १८ बगवंतल तंवा सते गोस्टितुन हिंदल तना निव्हिडि कीता कलितगा मरट पंटता मोदोडा ईसतुन दात\* मंदना इन्जेर मिय्तोर.

### सते गोस्टितुन केन्चि अद गोस्टि तीर काम किय्वल

१९ नावुर लाङ्नुर दादलिर-बायिक्निट! इद गोस्टितुन करि कीम्ट. हर मायनल केन्ज्जे तयर मंदना अनि वड्कनेके सोन्च कीसि जोक्सि वड्कना. वेघ्ने सोडुन वाय्वा. २० बारितेके मायनना सोड बगवंतल इचा किय्वल, नियत्ना सरि ताकुसा परो. २१ अदेन साटिने मिट्गा मंवल करब-पांदुन अनि

बगड-नियतुन सुटि कीसि ताकट. मीवा मन-दिलतुन रोपो बगवंतल इर्ता अद गोस्टितुन पिय्सि ताकट. इद गोस्टि मीकुन बचि किया परंता.

२२ बगवंतना वचन सिरिप केन्ज्वले आयो बति, अद वचन वेह्ता तीर ताकना. अहन ताक्वेके मीवा मिरट मोसेम कीतुर आंतिट. २३-२४ बगवंतना गोस्टि केन्चि, अद गोस्टि तीर कियोर वोर मायनल आर्सतगा तंवा मोकोम सूड्सि, तना बहन मंतोरो इंवल बहिर सोन्जि, येटने मरुङ्वन दात मंदंतोर. २५ बति बगवंतना वचंतुन दिहंते सूड्तेके तान्गा बतय कमि सेले. पर्जतुन अद मोकडो सुटि कियुसा परंता. अदेन साटि बोर्ते मायनल अद वचंतुन केन्चि, अद वेह्ता तीर कींतोरो, अद वचंतुन वोर बस्केन मर्गोर. बति अद वेह्ता तीर पिसंतोर. आतोर मायनल बद काम कीतेके गिर बगवंतल वोन आसिर्वाद सींतोर. २६ बोर्ते तंवा तनय बक्तना इन्जेर वेह्चेर, तंवा वेन्जेडुन जरब्ने इरा परोरो, वोर तंवा तनकुन मोसेम किय्वल आंतोर. वोना बक्ति बततुने कामि सियो. २७ रांडे वेय्लोकुन अनि पोसटि मरि-मिय्डुन तक्लिब मनेके, वूरकुन मदत किय्वल बक्तितुने बगवंतल कोर्सेर मंतोर. अहने इद दुनियता पाप तनकुन तुङ्वकने सुदुड मंवल बक्तितुन गिर बगवंतल कोर्सेर मंतोर. इहिन कल्ति सेल्वकने मंवल बक्तिये करल बक्ति आंद.

### चुडुर-पांदे सूड्वा

**२** नावुर दादलिर-बायिक्निट! मय्यते जगा जगा मिड्चेर मंवल, येसु किरिस्तु पर्बुन पोरो बरोसा इर्वलिर मिरट, बोने बेद-बाव्ते सूड्मट. २ नमुनतुन वोरोर मायनल सोनेतड मुदड अनि बारितड कप्पिड केसि अनि उंडे वोरोर माकडे मातड कप्पिड केसि, मिरट मीरे माय्वल रोतगा वातेर इंटु. ३-४ अस्के मिरट बारितड कप्पिड केसि सजे मासि वातोन सडा, “दादा! निमे इद चोकोट्ना कुर्सितगा उदा” इन्जेर वेह्चि, गरिबुन सडा, “निमे अगा निला सेलेके इगे बूड उदा” इन्जेर वेह्तेके, मिरट बेद-बाव तोह्चि, करब बुदिते तस्वा कीतुर आंतिट.

५ नावुर लाङ्नुर दादलिर-बायिक्निट! इद गोस्टि केन्ज्जट. इदेन मुनेन तनकुन पेर्मते बक्ति किय्वलिरकुन तंवा राज सीतोर इन्जेर बगवंतल वाग्दन सीतोर. अदेन साटि बगवंतले दुनियतुरा नदुडुन मुने गरिब मंवलिरकुन बरोसतगा दनेवंतलिर कींतोर. अनि वोरे तंवा राजना ईसा येतना इन्जेर वूरकुन नेमि कीतोर. ६ मिरट वीर गरिब लोकुरा हिजत वोसेर मंतिट.

\* १:१२ जीवता किरिट इतेके स्वर्गनगा बस्केट मंवल जीवा सेलेके मोक्सेम.

\* १:१८ यूदुल्क पंडुस्ता पंटता मोदोडा ईसा बगवंतनय आंद.

बति मी पोरो अदिकार ताकुसेर, मीकुन कोट्कनगा\* हव्लि किय्वलिर वीर दनेवंतलिर आंदिर कि आयुर? ओहो, वीरे आंदिर! <sup>7</sup>मिरट बक्ति किय्वल किरिस्तुना चोकोट्ना पोरोडुन रेहिंच वड्कवलिर वीरे दनेवंतलिर आंदिर कि आयुर? ओहो, वीरे आंदिर!

<sup>8</sup>“नीवा नीकुन पेर्मा कीतपे नी आजु-बाजुतुरकुन गिर पेर्मा कियना” इंवल दर्मा-ग्रन्त्ना मुके हुकुमुन मिरट पिय्सि ताक्केके, अद चोकोट्नय गोस्टि आंद.<sup>9</sup>बति उंदि मोका मिरट बेद-बाव तोहिकट्टे, दर्मता कानुंतङ्ग हुकुमकुन पिय्सि बय्मन आसि पापिर आंतिट.<sup>10</sup>बारितेके बोरे आयि अद कानुंतगा मंवलिक सम्दो हुकुमकुन पिय्सि ताक्सेर, उंदि हुकुमुन टूटि कीसि ताक्केके गिर, वोर पूरो दर्मता कानुंतङ्ग हुकुमकुन पिय्सि ताक्मकि इंवल बद्नम आंतोर.<sup>11</sup>बारितेके “पीर किय्वा” इन्जेर वेह्तोर वोरे, “बोनय जीवा गिर येत्वा” इन्जेर वेह्तोर. अदेन साटि वोरोर मायनल पीर किय्वेके गिर उंदि मोका बोनय जीवा येतेके, वोर अद कानुंतङ्ग हुकुमकुन बय्मन आसि ताक्कोर आंतोर.

<sup>12</sup>अदेन साटि माकुन मोक्डो सुटि किय्वल कानुंतुन पिय्सि, वड्कतुन हिंदल अनि काम कीततुन हिंदल बगवंतल तस्वा किय्वल मंतोर इन्जेर दिहंते ताकना. <sup>13</sup>बारितेके दुसुर पोरो दया तोहुर वूरकुन बगवंतल तस्वा कीनेके, वूर पोरो गिर दया तोहोर. बति बूर्ते दुसुर पोरो दया तोहंतेरो, बगवंतल तस्वा कियन नेटि वूर वेले संतोस अनि आनंद्ने मंदतेर.

### बरोसा अनि काम कीसि तोह्वल

<sup>14</sup>नावुर दादलिर-बायिक्निट! “नाकुन येसु किरिस्तुन पोरो बरोसा मंता” इन्जेर वोरोर मायनल वेह्तोर इंटु बति, अद बरोसा मत्ता तीर काम किय्वेके, आतल बरोसा बततुने कामि सियो. आतल बरोसा मायनन बचि किया परंता कि बतल? बचि किया परो. <sup>15</sup>नमुनतुन वोरोर दादले आयि, सेलेके उंदि बायिय आयि, तिले तिंडि सेल्वक सेलेके, पोंड्ले कप्पिड लेल्वक मत्तेर इंट. <sup>16</sup>अस्के मिरट वोर दादन सेलेके, अद बायिन बतय मदत किय्वक्ने, वूर सडा, “सांतिते सोन्जि, पेटिमेन तिंटु अनि मेंदोल-मेन कप्पिड पोंडट. अस्के मीकुन गर्मि वांता. इव सम्दो मीकुन बगवंतल सींतोर” इन्जेर सिरिप गोस्टिनेन वेह्तेके बतय पायदा पुटो. <sup>17</sup>अदे तीर्दे बरोसा मंता इन्जेर वेह्विंच, बरोसा मत्ता तीर काम किय्वेके गिर आतल बरोसा वॉटरि आसि सांता.

<sup>18</sup>बति नमुनतुन बोरे ना सडा, «नाकुन येसुन पोरो बरोसा मंत» इंदनुर्ते, अस्के नना, «नावा बरोसतुन चोकोट्नड काम्क कीसि तोहंतोन्» इन्जेर वोन वेह्विंच, «नीवा बरोसतुन काम किय्वक्ने तोहा पर्कि कि बतल?» इन्जेर पूसि कींतोन. <sup>19</sup>बगवंतल वोरोरे मंतोर इन्जेर निमे बरोसा किय्वल चोकोटे बति, बतल पायदा? अहन बूत्क गिरे बरोसा कीसेर, वेरिसि तरा तरा आसेर मंतड.

<sup>20</sup>एहे पिसटि! काम कीसि तोह्वक्ने मंवल बरोसा बततुने कामि सियो इंवडुन गवा पहजे कि बतल? <sup>21</sup>मा तोत्तोर बाबो अब्राहमुन हेतु कीम. वोर तंवोर मरि इसकुन बलिदान सिय्वल बोव्लत पोरो बलि सिय्ले आनेकेते, बगवंतल वोना कार्यतुन सूडसि, वोन नियत्नोर इन्जेर वोसोर कि सेले? <sup>22</sup>वोना बरोसतुन केय्दे कीसि तोह्वल मिरट करि कींतिट कि सेले? वोर तंवा बरोसा बातल इंवल केय्दे तोहतोर. <sup>23</sup>“अब्राहम बगवंतन पोरो बरोसा इर्तोर. अदेन हिंदले वोन नियत्नोर इन्जि बगवंतल वोसोर” इंवल दर्मा-ग्रन्त्ना वचन पूरे माता. अद तरिकते अब्राहमुन बगवंतनोर सोस्पल इंवल पोरोल वाता. <sup>24</sup>इद सूडसि, मायनल सिरिप तंवा बरोसतुन हिंदल आयो बति, तंवड कामकुन हिंदले, नियत्नोर इन्जेर बगवंतल वोसोर इंवल मिरट करि कींतिट.

<sup>25</sup>अदे तीर्दे, राहबु<sup>#</sup> इंवल लन्जे वेय्लो इज्जयेल देसुर कब्रियलिरकुन तंवा रोन मकुसि, सम्दो मान-मर्यदा कीसि दुस्रो सरिय सारि कीता. अद चोकोट्ना कामुन हिंदल, «नियत्ना वेय्लो» इन्जेर बगवंतल वोसोर. <sup>26</sup>बहंते परन सेले अद मेंदोल साता लेकते वांतयो, अहने चोकोट्ना काम कीसि तोहुर वूरा बरोसा गिरे साता लेकतेन वांता.

### मीवा वेन्जेडुन जरब्ने मनल करुसट

**3** नावुर दादलिर-बायिक्निट! मिह्गटल वेलेटिर बोदा वेह्वलिर आय्यट. बारितेके बोदा वेह्वलिर माकुन वेले कटिंता तस्वा मंदंता इंवल मीकुन टावये. <sup>2</sup>मरट सम्दिर गिरे बचोड्डो गलितड कींतट. तना वड्कवलिक गोस्टिनगा उंदि गिर तप कियोर वोर बर्पुर गुन वाले मायनल आंतोर. आतोर मायनल तंवा पूरो मेंदोडुन जरब्ने इरा परंतोर. <sup>3</sup>मरट ताकुस्ता तीर ताकना अनि मावा जरब्ने मंदना इन्जेरेंते कोंदन<sup>\*</sup> वेसुनि दोहंतट. <sup>4</sup>अहने डगुर रूकता नमुना येतेके गिर, बेय जोर्ते वडि वासि तान दुर्सेर वोंता. बति तान ताकुस्वल मायनल अद रूकतुन पेजे मंवल चुदुसि कटेतुन<sup>\*</sup> तिरुस्तेके, तना बेके

\* 2:6 सेलेके पन्चद्वक्नगा.

\* 3:3 ग्रीकु बासते इहिन लिहि कीसि मता: कोडता मुस्कुरितुन लगम दोहंतट.

\* 3:4 तेलुगुते अद चुदुसि कटेतुन

“चुक्कानि” इंतेर.

# 2:25 येहोसुवा 2:11

सोंदना इत्तेके हके तान मलुसा परंतोर. <sup>5</sup> अहने वेन्जेर मावा मेंदोडगा चुडुसि बागम आंद. बति अद बेय डगुक डगुक गोस्टिड बड़कंता. अदे तीर्दे, चुडुसि मिन्गुल डगुर केडतुन बचोर-बहन दुंडुसंतयो सोन्च कीम्ट.

<sup>6</sup> मावा वेन्जेर गिरे उंदि तड़मित दात्नय आंद. करब्ने निन्चि मंवल मावा मेंदोडगा उंदि बागम आसि मंता. अद वेन्जेर करबुन पूरो मेंदोडगा पग्नि कीसि, माघ्नना जिन्गनितुन तड़मित दात लावि कींता. अहन लावि किय्वल सक्तितुन अद वेन्जेर पातड़तल\* येतंता. <sup>7</sup> सम्दि जंवरकुन, पिटे-पुरडुन, पुर्ग-बुसितुन, सम्दुरतगा मंवलिक जिव्रस सम्दोतुन इदेन मुने अनि इंके गिर मायनल जरब्ने इर्सेन मंतोर. <sup>8</sup> बति वेन्जेडुन इंके वेरि बोरे तंवा जरब्ने इरा पर्मकि. अद वेन्जेर जीवा तेंड्वल विक्ने निन्चि अविवक्ने करब कीसेरेन मंदंता.

<sup>9</sup> इद वेन्जेडेन मरट पर्बु आय्वल बाबो बगवंतन डगुर-पान सींतट. इदे वेन्जेडे बगवंतना रूप्ने पुट्टोर माघ्नन सापेना सींतट. <sup>10</sup> आसिर्वाद अनि सापेना उंदिय तोड़दल बहिर वासेर मंतड. नावुर दादलिर-बायिक्निट! अहन मरट मंवा. <sup>11</sup> सोवोर येर अनि चोकोट्ना येर बस्केट्के उंदि जलतल पूटे मायोड. <sup>12</sup> नावुर दादलिर-बायिक्निट! अन्जुरि मरतुन मर्का पंडिड\* बस्केट्के सादोड. अहने आडुर वेलितुन अन्जुरि पंडिड बस्केट्के सादोड. अदे तरिकते, सोवोर येता जलतल चोकोट्ना येर पूटे मायो.

### बुदि-गियन वालिर

<sup>13</sup> बुदि-गियन वालिर अनि समजदार्क मी रोपो बोरे मंतेर कि? अहन मत्तेके वूर सते-पांदे ताकसेर, बुदि-गियन सीता अद चुडुर-पांदुन पिय्सि, वूरड कार्यन तोहट इंट. <sup>14</sup> उंदि मोका मीवा दिलतगा कुटा कुटा अनि लाल्सल गुंते मन्जि, डगुक डगुक गोस्टिड वेह्चेर सतुन मकुसिय्मट. <sup>15</sup> मिह्गा मंवल ईतल बुदि-गियन स्वर्गनल रेय्स वाय्मकि. इद मीकुन दुनियतल वाता बुदि-गियन आंद. ईतडगा बाव-बक्ति सेले. इद सयंदा बुदि-गियन आंद. <sup>16</sup> बहन इत्तेके बगते कुटा कुटा अनि लाल्सलिक गुन्क मंदंतडो, अगा जगडड लोलिड अनि सम्दो तीकर्नड करब काम्क मंदंतड.

<sup>17</sup> बति स्वर्गनल वाय्वल बुदि-गियन वेले पवित्रा आंद. अद बुदि-गियन सांतितुन पेर्मा कींता. अद बोने बतय इंवक सादु आसि मंदंता. अद बुदि-गियन वेह्ता तीर केन्जंता अनि दयते सूडंता. अनि अद चोकोट्नड काम्क कीसेर बेद-बाव तोह्वक मंदंता. अद बुदि-गियन सतेमुन पिय्सि ताकंता. <sup>18</sup> सते-पांदे

अनि सांतिते ताक्वलिर अद विजतुन वीच्चि, सत्ना अनि सांतिता पंटतुन कोयंतेर.

### बगवंतन करुम वरट

**4** मिह्गा जगडड अनि लडेयक बततुन हिंदल जगसेर मंतड? <sup>1</sup> मीवा दिलतगा पुट्टवलिक आसन उंदितुन उंदि अर्सि वाय्वा सोन्जिने इव जगसेर मंतड. <sup>2</sup> मिरट आसा कीकिट बति, अद मीकुन पुटो. अद कुटा कुटा गुंता आसतुन साटि माघ्नन जकंटिट. जगडड अनि लडेयक कींतिट बति, आसा कीकिट अद मीकुन पुटो. मिरट कोर्ता अद मिह्गा मनो. बारितेके बगवंतन मिरट तल्किवट. <sup>3</sup> मिरट बगवंतन तल्केके गिरे अद मीकुन पुटो. बारितेके मीवा सुक-बोगुन साटि कर्चि किय्ले करब्ना आसते तल्कंटिट.

<sup>4</sup> इद दुनियतड सुक-बोगुन सडा दोस्तन कीतेके, बगवंतन पेर्मा कीतप आयो बति, पीर कीतप आंता इंवल टावा सेले कि बतल? इद दुनियतुर सडा दोस्तन कीका इंवल, बगवंतन पगा-दारल आंतोर. <sup>5</sup> “बगवंतल मा सम्दिरकुन सीता, अद आत्मते मरट तंवय बक्ति कियना” इन्जेर दर्मा-ग्रन्तगा, वटि आगमे लिहि कीसि मंता इंतिट कि बतल? <sup>6</sup> बगवंतल माकुन वेले पेर्मता-दयते सूडसेर मंतोर. अदेन साटिने दर्मा-ग्रन्तगा, “बगवंतल गर्वते मंवलिरकुन उल्टा तिरियंतोर.

बति कमि-पांदे मंवलिर पोरो पेर्मता-दया तोहंतोर”# इन्जेर लिहि कीसि मंता.

<sup>7</sup> अदेन साटि, बगवंतन मुने चुडुर-पान कीसि मंट. सयंदुन उल्टा तिरियट. अस्के वोर सयतन मिह्गटल परर आंतोर. <sup>8</sup> बगवंतन करुम वरट. अस्के बगवंतल मी करुम वांतोर. पापेस्तलिर्निट! मीवड पापकुन नोरट. बह्के मातुर्निट! मीवड दिलकुन सुदुड-पान कीम्ट. <sup>9</sup> पापेस्तलिर्निट! विचर्ते अनि दुक्सते मंट. जोर्ते आडट. कव्वडुन बद्लि आड्सेर अनि आनंदुन बद्लि दुक्सते मंट. <sup>10</sup> पर्बुना नदुडुन मुने मीवा मिरट चुडुर-पान कीसि मंट. अस्के पर्बु मीकुन डगुर-पान सीतोर. <sup>11</sup> दादलिर-बायिक्निट! मीवा मिरट वोरोन वोरोर बयमंते राड्मट. तंवोर सोसन राडि सीतेके आयि सेलेके वोन पोरो तस्वा कीतेके आयि, वोर माघ्नल दर्मता कानुनुतुन बयमन आतोना लेकते वांतोर. मीवा काम सिरिप अद कानुनुतुन पिय्सि ताकना. अद कानुन चोकोट्ना सेलेके वायुट्ना इन्जेर तस्वा किय्वल मीकुन हक सेले. <sup>12</sup> पर्जतुन पोरो नायदा तस्वा किय्वल अनि दर्मता कानुनुतगा हुकुम्क लिहि कियुस्वल वोरोरे बगवंतल आंदुर. पर्जतुन बचि किय्वल अनि नासेडम किय्वल

\* 3:6 पातड़तल सेलेके सयंदल इन्जेर मंदंता. \* 3:12 ग्रीकु बासते ओलिवा पंडिड इन्जेर मंता.

# 4:6 गियंतड गोस्टिना 3:34

गिर वेरे आंदुर. ते आजु-बाजुतुर पोरो सिक्सा वाटट इन्जेर वेहले नीकुन बोर अदिकार सीतोर?

### डगुक डगुक गोस्टिड वेहमट

<sup>13</sup> केन्जट! “नेंड सेलेते नाडि बत्तेर उंदि चहर्दे सोन्जि, अगा उंदि साल वेरि मंदंतोम. वरट! अगा बेपरि कीसि कोतड वेले कमय कीकट” इन्जेर वेहवलिर्निट करि कीम्ट. <sup>14</sup> नाडि बतल जर्गतयो मीकुन टावा सेले. मीवा जीवतुन बारेते सोन्च कीम्ट. मिरट जुलुक दिसि उंडे जुलुकने मयड आसि सोंवल, पोयता दुहरतुन दात्नुर आंदिट. <sup>15</sup> अहन इंवडुन बद्लि मिरट, “पर्बु जीवते इत्तेके, इद कीकोम अद कीकोम” इन्जेर वेहना. <sup>16</sup> बति मिरट अहन किय्विट. लांडि-लबड डगुक डगुक गोस्टिड वेहचेर गल्तिड कीतिट. <sup>17</sup> अदेन साटि चोकोट कियना इंवल, टावा मन्जि गिर चोकोट कियोर वोन पाप लागंता.

### दनेवंतलिरकुन दम्कि सिय्वल

**5** ये दनेवंतलिर्निट, केन्जट! मिरट दुक्सते आड्सेर किलियट. बारितेके मीकुन गाचर-गंडल्क वाख्वलिक मंतड. <sup>2</sup> मीवा दन-दव्लत कडियंता अनि मीवड पाडुक वेलुम पियंतड. <sup>3</sup> मिहगा मंवल सोने अनि कूरा चिलिम पियंता. अद चिलिम मी पोरो उल्टा गवा वेहिच, मीवड मेंदोलकुन तड्मित दात दुडुसंता. इव आक्रितड दिवोस्कने गिरे मिरट वेले दन-दव्लतन्वा डीग वाड्सेर मंतिट. <sup>4</sup> केन्जट! मी वहुक्नगा काम किय्वलिर बूयतलिरकुन, मिरट बूति सिय्वकने पसि कीतिट. वूरड बूतिड मी पोरो पिरदि कीसेर मंतड. वूर बूयतलिर आड्वल स्वर्णा दलम्नोर पर्बुनड\* केवकुन केन्जा वाता. <sup>5</sup> बोमित पोरो मीकुन पसंद वाता तीर सुक-बोग्ने पिसेर, कोख्वल दिनमुन साटि, मीवड दिलकुन कोडचुसि तयर कीसेर मंतिट. <sup>6</sup> मिरट नियत्ने ताक्वलिरकुन सिक्सा वाट्सि, वूरकुन जक्किट बति, वूर मीकुन मर्ला बड्मकि.

### सम्दोतुन वोर्चि मुने दायना

<sup>7</sup> अदेन साटि दादलिर-बायिक्निट! पर्बु मल्सि वानल वेरि, मिरट वोर्चि चोकोटे सूड्सेर मंट. बहन इत्तेके, वोरोर केतिदारल तंवा बोमितगा वाट्वल चोकोट्ना पंटतुन साटि, बहन सूड्सेर मंदंतोरो दिहंते करि कीम्ट. वोर केतिदारल मोदोडा पिर वासि\* पंटा पिरंता अगटल्ते बेर्सि, पंटा कोथ्ले वानल वेरि वोर्चिकुन चोकोटे सूड्सेर मंदंतोर.

\* 5:4 स्वर्णा दलम्नोर पर्बुनड इत्तेके सक्ति वाले बगवंतल.

<sup>8</sup> मिरट गिर मंदुन गट कीसि, वोर्चि सूड्सेर मंट. बारितेके पर्बुना मल्सि वाख्वल वकत करुम वासेर मंता. <sup>9</sup> नावुर दादलिर-बायिक्निट! वोरोन पोरो वोरोर चहिडड वेहमट. अहन वेहतुरकुन पर्बु सिक्सा वाटंतोर. केन्जट! वोर नायदा तस्वा किय्वल अदिकारि वेघ्ने वाख्वल मंतोर.

<sup>10</sup> नावुर दादलिर-बायिक्निट! पर्बुन बारेते वेहतुर पर्वक्तलिर तक्लिब्क बोगे मातेर. वूर पर्वक्तलिरा नमुना येच्चि मिरट ताकट. <sup>11</sup> तक्लिब्क वोर्चि बरोसते ताक्तुरकुन आसिर्वाद येत्तुर इंतट. योबुना वोर्च्वल गुंतुन बारेते केन्चि मंतिट. पर्बु वोन आक्रित बतल इनम सीतोर इंवल मिरट सूड्तिट. पर्बु वेले दया अनि किवुल वाले आंदुर. <sup>12</sup> नावुर दादलिर-बायिक्निट! सम्दिन तेर मुके बतल इत्तेके, स्वर्णा पोरोडेन आयि, बोमिता पोरोडेन आयि, उंडे दुमो बततय पोरोडेन आयि, मिरट वोट वाट्वा. सिरिप बतल मंता अद वेहट. अहन मत्ता तीर वेहतेकेन बगवंतल मीकुन सिक्सा वाटोर.

<sup>13</sup> मिहगटल बोरे आयि तक्लिब्कनगा असि मत्तेके, वोर पार्तना कियना. आनंद्ने मत्तोर वोर, बगवंतन पार्तना-विंति कीसेर पाटड वारना. <sup>14</sup> मिहगटल बोरे आयि येड्कि-दुक्ने मत्तेके, चर्चितुर पेदोलकुन वोर केयुसना. वूर वासि पर्बुना पोरोडे निय सोक्सि, वोन साटि पार्तना कियना. <sup>15</sup> अहन बरोसते वूर पार्तना कीतेके, वोर दुकेलल चोकोट आंतोर. पर्बु वोन चोकोट कीतोर. उंदि मोका वोर पाप्क कीसि मत्तेके, वोनड पापकुन पर्बु मापि कीतोर. <sup>16</sup> अदेन साटि बवे पाप्क कीसि मन्किट्टे, बोनड वोट्क पाप्क मी नडुम मिरट वोपट अनि वोरोन साटि वोरोर पार्तना कीम्ट. इदेन हिंदल, मीवा तबियत चोकोट आंता. नियत्नोना पार्तना वेले सक्तिते मन्जि बचोरो चोकोट किया परंता.

<sup>17</sup> येलियल मा दात्नोरे सादरन मायनल आंदुर. पिर अर्वा इन्जेर तंवा मंदे पार्तना कीतोर. ते सडे मूंद साल्क वेरि, बोमित पोरो पिर अर्मकि. <sup>18</sup> अद आता पेजे पिर अरना इन्जेर मर्ला पार्तना कीतोर. अस्के हाबर पिरदुन अरुस्ता अनि बोमि तन्गा उस्तड़ पंटड पंडुस्ता.

<sup>19</sup> नावुर दादलिर-बायिक्निट! मिहगटल बोरे आयि सते सरदुन बहके मातेके, वोन मल्सि सत्नगा तत्तेके इद गोस्टितुन करि कीम्ट. <sup>20</sup> पापेस्तन पाप्ना सरितल सते सर्दे मलुस्तोर वोर, पापिना आत्मतुन मरंतल तपुसि, बचि कियुस्तोर आंतोर. इदे आय्वा पापिनड पापकुन बगवंतना केय्दे वोर मापि कियुस्तोर आंतोर.

\* 5:7 अद जागतगा उसन वकत्ने जरसि पिर वांता अनि पंटा कोयन मुने बेय पिर वांता.

